

Alal Misalro




Scripture Gift Mission

3 Eccleston Street,
London SW1W 9LZ

Printed in Great Britain

Alal Misalro

Misalwa anyi Bargaando



Misalwa anyi Mana Alabe, suro Kitawu Kəmaben təwandin.
Zauro ngəla Kitawu Kəmabe gonəm kəranəminga,
awoa bayen Alabe adamgana sammasoro.

Yisa Almasihu co



Mana Alabega fanowo

Natoma

Alaye wono səmondoga bangnowo, arowo nanzəro, mananzəga fanowo ro fanduwı wono.

Ishaya 55:3

Bargaande Yisaye wono: Barema laa kuloro lezəna kusunyi sənatin duwonyi, kusunyi laadə kəla diwalbero fiyataa. Daji amye gəwatgəwatsa ngudowaso ye isa sordoru shal jawo. Laa ye kəla kaubero fitaa liyadanya, kəliwu baro sərəl hargada. Kusunyi laa ye suro kəskawa kaliabero fiyataanya, rokko liza kəskawa kaliadəye sandiga kəpcaa. Kuru kusunyi laa ye katti ngəlaro fiyataanya, liza tada mea mea cakko.

Maana misal adəbega cə wono: Kusunyidə shima Mana Alabewo. Sandi kəla diwalbemadə, sandima am Mana Alabedəga fanzanalalan Yiwulisaye isə wande kasatsa katə sawandənyiro karəgənzan gojinmawo. Sandi kəla kaubemadə, sandi ye sandima am duwonyi Mana Alabedəga fanzaiya karəgə kəjiaro samoyin duwonyi,

sandilan fərtə ba nankaro ngəwuro tus-sainba, yim jarawa ishiya ngaworo waltain. Kusunyi suro kəskawa kaliabero fitaanamasodə sandi ye sandima am Mana Alabedəga fanzana zaain duwonyi, shiwol-a ləman-a kəji dinabe-aye sandiga kəpsaa wuraza nyama kudoro kattero. Amma kusunyi katti ngəlabemadə, sandima am Mana Alabedəga fanza karəgə ngəlan roza nyetsa hatta nyama cawando.

Luka 8:5-8, 11-15

Bargaande Yisaye wono: Ndu duwo mananyiga fanzə, kuru kam wuga sunotə-namaga kasatsənamadə, ro abadabe səwandəna. Shiro howum sadinbawo, dalilnzədə kərmulan falzə roro isəna nankaro.

Yahaya 5:24

Fato garta kam indibe

Rogana gonowo kalima karəgəndolan kok-sana adəga kasannowo, awo shima raktənzə nandiga yitkaabeawo. Yakub 1:21

Bargaande Yisaye wono: Kam nanyiro isə mananyiga fanzə, awo gulngənaga sədinmadə, misalro nandiro misalnzə gulnzaakin. Kam adə misalro ruminga, kam fato garta badizənağairo rataltəgin. Fato

garta badiyanya, daji bəlaa lazə, lazə, lazə
kauro nazəgə duwonyi fərtə fatobedə
kəla kauben garwono. Ngawo adəben daji
ngada falalazə fatodəro ləratkatəgə
amma fatodə lolozənyi, dalilnzədə gəna
ngəlan shiga gargada nankaro.

Amma kam duwonyi mananyiga fanzə,
awo gulngənaga sədinbamadə, misalro
ruminga kam fannzə cidin fərtə baaro
garzənagairo rataltəgin. Fato garzə
daanya, ngada falalazə fatodəro lərat-
katəgənya, sadən fatodə gərəp fiyatə.

Luka 6:47-49

Mana Alabega kərənnuwinga, ngəlaro
hangal gənanowo . . . awoa am bargamadə
sandima am Mana Alabega fanza
zaanamawo.

Luka 8:18. Luka 11:28

Kam zaiza

Gonyi Taurebe laa Yisaga rizaptəro cizə
dazə wono, Sayinna, abi dike ro abadabe
fandəkin? sə cuworo. Yisaye shiro jaap-
səgə wono, Abi Alaye suro Taureben
gulzo? Kuru kəranəmmadə abi fanəm?
Kamdəye jaapsəgə wono, Ala
Kəmanəmgə raye, karəgənəm samma-a
ronəm samma-a dunonəm samma-a ha-
ngalnəm samma-an kunterro. Kuru

kəmaskinəm yega kəlanəmgairo raye, sə gulwono. Yisaye, Kalkalro jaawu cam, sə shiro, Nyi ye futu adəgai de, ro fandəmin, wono. Kamdə ye kəlanzəga muminro gotaro Yisaro, Yo, ndu gəle kəmaskinyiwo? wono.

Daji Yisaye shiro jaapsəgə wono, Kam laa Baitul-Mukadaslan cizəna Jerkoro lejin duwonyi, zaləmwaye shiga kapsa, səlak shiga linza, nuingairo shiga babaksa kolza hapkata.

Ngai duwonyi liman laa diwaldəmben kadio. Limandəye shiga curunya shiti falzə dərizə kozə lewono. Adəgaima ladan laa ye saktəmben kadio. Shi ye shiga curunya shiti falzə dərizə kozə lewono.

Adəgai duwonyi diwalye kam Samariyabe laa nadəro cuwudo.* Kam



*Zamandən indikate Yaudiwa-a am Samariyabe-an nəmkam bawo.

Samariyabedəye shiga curunya, shiga njimalzə isə tununzəro kəndagə-a nji anabbe-a fizəgə, kəlezə, shiga koronzəro dam gənazəgə kusotoramro suwudu, shiga rawiwono. Dina waanya gursu indi sutuluwu kəma fatobedəro cə shiro wono, Shiro njiskəne, awo adəga kozəna yirwatəmiya yaye sa iskiya nyiro rəmbukin, sə lewono.

Suro am yakkə adəben ndunza kam zaləmwaye kapsana adəro mashiworo curum? sə Yisaye kamdəga cuworunya, daji kamdəye jaapsəgə, Kam duwonyi shiga njimalzənamadəma, wono. Daji Yisaye shiro wono, Nyi ye lene, futu kamdəye sədənadəgai de. Luka 10:25-37

Abi diuwiya Ala Kəmandoye sərəwo? Ala Kəmandoro rinowo, awo sərəgəna samma dewo, shiga rawowo, shiga gaiwo karəgəndo samma shiro kolgataaro, kuru wadawanzə-a awowa nandiga səkkənama-a samma gaiwo.

Awoa, Ala Kəmandodə, shima abisobe Alawo, nəmkəma ye, abisobe shima Kəmawo, Ala Kəmbə . . . kusotoga sərəgəna, shiro kəmbu-a kazəmu-a cin. Adə nankaro nandi ye kusotoga rawowo.

Taurebe Kitawunzə Kən'uwumi 10:12-13,17-19

Ngawo awo nandiga sakkəna diuw dazənaben, awo gulluwinmadə, Andiga daraja waladibe tiyende, awo andiga sakkənama bas diye, gullowo. Luka 17:10

Galiwu hangal baa

Kam laa suro sannobedən Yisaro, Sayinna, yanyiganaro gulle waratadə wu-aro yaksə, wono. Daji Yisaye shiro jaapsəgə wono, Ndu wuga shara au ləgalindoro galazə duwo, hatta waratando yanggin?

Waltə sandiro wono, Njiskənowo, ndələmbisoro katənowo, dalilnzədə abi kamyə zəgantiya yaye, shi gənyi shiro ro cin.

Daji sandiro misal adə cə wono, Kulo galiwu laabe nyama ngəwu cikko. Galiwudəye zuwulu karapsə wono, Abi diki? Ngo na duwonyi faida kulonyibe yikkəkinma bawo. Daji waltə wono, Ngo awo dikində, bərawanyiga wurnge kura kura tandəke, surodəro faida kulonyibe-a anzawanyi-a samma figəkin. Waltəke kəlanyiro, Haiyaro razəgə ngəwu gantəmma, awowa məradəwanəm saa ngəwube galjonoma. Nda kolle tusəne, tai danəm bui ye yai ye, kəji fane.

Amma Alaye shiro wono, Kam hangal baa, nonəmi wa bune adəro ronəm samoyindəro? Kuru karewa kəlanəmro samnəmmadə ndubero walzai?

Daji Yisaye tamozəgə wono, Kam duwonyi razəgənzə musko Alabero səkkənyi kəlanzəro sapsənamadə, futu kam adəro waazəgənadəgai shi yero waazəgin. Luka 12:13-21

Wande razəgəndo dinan samnuwi: dinadə barwua ye kanamma ye kulongua ye. Amma razəgəndo samin gənanowo: samidə, barwu ye ba, kanam ye ba, wala kulongua ye gənyi. Dalilnzədə na duwo razəgənəm dəganalan karəgənəm ye karga nankaro. Matiyu 6:19-21

Wande kəla awo duwonyi rondoro buwin-a yawin-aben shiwoltuwi, au kazəmuma tigəndoro kəmuben. Rodə kəmbuga kozəna, kuru tigə ye kazəmuga kozəna. Awando Samibeye awowa anyi samman mərədəndoaro nozəna. Amma anyisodə matadəroga, burwo hawallan kərmai Alabega kasannuw awowa shiye sərəgəna kəndo-aro karəgə yikkowo, gapsənamasodə ye nandiro foksaain.

Matiyu 6:25, 32-33

Nzəkkawoma amga nzəkkaworo
majin

Misal dimi fatsəgənabe

Ngaima haraji mowomaso-a ashi Alabeso-a ye shiga fantəro nanzəro zazantain. Karapka adinwube sandiro Farisa saində-a maləmwa Taurebe-a ye nunuksana, Kam adə ashi Alabeso-a tawaktana hattaa kəmbu rokko zawin, sain.

Daji Yisaye sandiro misal adə gulzəgə wono, Ca kamndo laa nanzən dimi meaa duwo falnza fatsəgiya, ra filəgarin lukko ləgarindəga sunyeramlan kolzə fatsəgənadəga lezə barazə hattaa səwandinbawo? Kuru səwandiya, karəgə kəjiaro ngawananzəro gənazəgin. Fatoro waltiya, daji sawawanzə-a kəmaskiwanzə-a bowozə



sandiro, Wuga kəlelen banasənowo, diminyi fatsəgənadəga fandəkəna, shin. Adəgaima nandiro gulnzaakin, kəlele duwo kəla bigəma fal təpsənaben samilan tədində, muminwa filəgarin lukko ləgarin təptəsodəma sandilan badəmaga kozə-naro tədin.

Luka 15:1-7

Bargaande Yisaye wono: Wuma sunyima ngəlamawo. Sunyima ngəlamadə kəla dimiwaben ronzə səladin.

Yahaya 10:11

Misal kungəna fatsəgənabe

Ra ca kamu laa gursunzə mewua duwo fal fatsəgiya, fatəla wassə fannzə fərazə kulassə ngəlaro mazə hatta səwandin-bawo? Kuru səwandiya, daji koitawanzəso-a kəmaskiwanzəso-a bowozə, Wuga kəlelen banasənowo, gursunyi fal fatsəgənadəga fandəkəna, shin. Adəgaima nandiro gulnzaakin, malaiyawa Alabe ye kəla bigəma fal təpsənaben kəlele sadin.

Luka 15:8-10

Awoa Kamdə awo fatsəgəna manəm yitkaa nankaro kadio.

Luka 19:10

Misal tada fatsəgənabe

Ala Kəma Kəmboye wono, Nandiga nzamowoke, Awandoro walnge, nandi ye wuro fero-a tada-aro walluwin.

2 Korintiwu 6:17-18

Bargaande Yisaye wono: Kam laa tada-wanzə india, gajidəye awanzəro wono, Bawa, wuro waratanyi she, sə awanzaye sandiro kəntanzəga yakciwo. Tussənyi ngawo adəben, gajidəye kəntanzə samma gozə zawal lardə laa cintəbe sətə lewono. Nadən kəntanzə samma nəmtandalan cirwato.

Ngawo kəntanzə samma sərwatə dazənaben, kəna zau lardədəro kargawo, shi ye musko dea. Daji lezə kam laa lardədəbega bawa njimmaro gowono. Awanzə njimmadə ye shiga sunyi godubero səkkə karaaro cunoto. Adəgaima kənaro kəmbu duwonyi goduwaye zawində zəwiya səragənadəso, ndumaye shiro cə zəwunyi.

Amma hangalnzəro kargaanya wono, Ha, waladiwa bawanyibe ndawu kəmbuye sandiga sətə gapsənadə, amma wu ngoshi kənaye sheshin. Adədəroga cinge na bawanyibero lenge shiro, Bawa, Kəma

Samibero bigə dikəna, nyi yero bigə dikəna. Kuru tadanəmro wuga waltəm bowotaro nagəkənyi. Wuga suro waladiwanəmben falnzagairo gone, nging, sə daji cizə na awanzəbero lewono.

Amma cintədəman awanzəye shiga curunya, shiga njimalzə guda gozə shiga kapsəgə shiro kərgatəgə. Daji tadadəye shiro wono, Bawa, Kəma Samibero bigə dikəna, nyi yero bigə dikəna. Kuru tadanəmro wuga waltəm bowotaro nagəkənyi. Yaye awadəye waladiwanzəro wono, Doiro kulwu ngəla ngalwo shiro kudowo yikkəmugənowo, kulum ye ngulondonzəro yikkowo, suno ye shinzəro zagənowo. Kuru kəna yele kulgatadəga kudowo duwanowo, kawuske diyowo tamtam gonyowo. Tadanyi adə ca nuna amma kərma roazəna, ca fatsəgəna amma kərma təwandəna nankaro. Luka 15:11-24

Kəladowaso nəmkelado kollowo, am diwiso ye zuwulu nəmdiwibega kollowo, na Kəməbero arowo, Ala Kəmandeye nandiga njimalzə tilomiro gafərnzain nankaro.

Ishaya 55:7

Adə nankaro təmnowo, Alaro kalaktəgənowo, Alaye danawundoga baro sədə.

Cedi Kingiyamwabe 3:19

Təmnowo Mana Alabega kasannowo

Kəska tada baa

Nadən am laaye Yisaro hawarro hawar am Galilibe laa layanza sadin duwonyi gumna Bilatusye səkkə sandiga ceshe-nənya, bu amdəbe-a laya amdəye sadə-nadəbe-a kəltənabedə hawarajaanya, Yisaye sandiro jaapsəgə wono, Təmanuwa am Galilibe anyi azawu adə sasana nankaro am Galilibe gapsənadəga bigən kozanaro wa? Lala ngai gənyi, nandiro gulnzaakin. Nandi ye təmnuwiga sandigai samma yinuwi.

Ra am mewun wuskun duwo Siluwamlan kəla shorobe sandiro fitəgə sostonunadə, təmandon am Baitul-Mukadasbe sam-masoga aiwun kozanaro wa? Lala ngai gənyi, nandiro gulnzaakin. Nandi ye təmnuwiga sandigai samma yinuwi.

Daji sandiro misal adə gulzəgə wono, Kulo anabbe kam laaben kəska tada kəjia mbeji, tada kəskabedə dororo saa yakkə ngaro kadioso abima səwandənyi. Daji kam kulodəga sattinmadəro wono, Tada

kəska adəbe dororo saa yakkə ngaro kadikoso abima fandəkənyi. Adə nankaro salle, wande cididəga bannazənyi. Daji yattomadəye jaapsəgə wono, Ala ngəwuro, kolle kəmənde ye, shiga kumnge bəndər figəke. Tada gojiya, daji. Gozənyiga saltə.

Luka 13:1-9

Kəmandedə . . . nduma yijiya səragənyi, amma ndu yaye təpsə nankaro nandiro nyetciwo.

2 Biturus 3:9

Awoa Alaye dinaga zauro səragəna nankaro, hattaa Tadzəzə tilo longga kaino, saawu adəbero ndu duwo shiga kasatsənamadə wande yizənyi, amma ro abadabe səwandə nankaro.

Yahaya 3:16

Kam kəlanzə bassəna-a kam kəlanzə zazaksəna-a

Kuru Yisaye misal adəga am kəlanzaga muminro goza am gadesoga ruzanaro gulzəgə wono, Am laa indi Fato Kəmabero





Alaga adutəro leyada, faldə Farisa faldə haraji mowoma.*

Daji Farisadə cizə dazə ngumnzəro aduzəgə wono, Yaa Ala, nyiro askərngəna kəla wu am gadesogai gənyi, lusuranma, kəlado, kənzənama, au bia haraji mowoma adəgai gənyi. Magə woson indiro asham zəmngin ye, kuruson abi fandəkiro walwono yaye suro mewuben fal zakkaro tuluwukin.

Haraji mowomadə ye tukkaan daata kəlanzəma samiro hapsənyi, karəgənzə zəmbun cezə, Yaa Ala, wudə nyiro ashingəna, wuga njimalle, wono.

Daji Yisaye tamozəgə wono, Nandiro gulnzaakin, waltaiya, Farisadəro haraji mowomadəma shi-a Ala-a katenza

*Mai Rumbedə Yaudiwa kərigən gərzə lardənzaga zəwuna.

Haraji mowomasodə ye Yaudiwa yaye, kəla harajidə sapsaiya mai Rumbero sadin nankadəro, Yaudiwa amanzasodəye sandiga ashi Alabe-a kalro gowada.

kələwawo. Awoa ndu duwo kəlanzəga zazaksənamadə shiga bassain, kuru kam kəlanzə bassənama ye shiga zazaksain.

Luka 18:9-14

Bargaande Yisaye wono: Wu muminwa yikkəm təpsa nankaro gənyi kadiko, amma kəla am Alaro ashizanaso nankaben.

Luka 5:32

Am rokuraa Alaye wazəna, amma am rogana gozanaro her sədin. Daji adə nankaro rogana gonowo, cidiya Alabero arowo, nandiga zaksə, shi ye sa raamdenzəbe sətiya nandiga zazakcin.

1 Biturus 5:5-6



Kamandoga gafərnowo

Misal kam kamanzə gafərtəro wazənabe

Daji Biturus cizə na Yisabero isə, Yisaga suworu wono, Yaa Kəma, kamanyiye wuro bigə sədinga, gadegade tulurro la ndawuro shiga gafərngin?

Yisaye jaapsəgə wono, Nyiro gadegade tulurro gənyi gulnzəgəko, tular gadegade fitulurro, sə, Saawu adəbero daji, kərmai Alabedə mai laa musko waladiwanzəben komkomi ləmannzəbe sədiya səragənaro rataltəgin, sə asuzəgə wono. Komkomidə badiyanya, kam jaka dəwu mewuro kusuro zəgainmaga shiro cowudo. Kamdəro rəmboro katteranya, awanzə njimmaye səkkə shi-a kamunzə-a dulinzə-a kəntanzə samma-aso təladə kusudəga tərəmbu wono.

Daji waladidə fuwu bawanzə njimmaben ngurumngurumzə ngodozə wono, Kanadi tai, nyiro samma rəmbukin diye, wono. Bawanzə njimmadə ye shiga njimalzə kusudə shiro wazəgə shiga kolzə lewono.

Yaye shi waladi adomadə deyarō culuwunya, shi ye waladi kamanzə gursu yor falro zəgainmaga curo. Bia dawu waladi kamanzəbedəga fərazə rəp sətə wono, Awo nyiga nzəgakində wuro rəmbe, sə sətə daada. Waladi kamanzədə ye fuwunzən ngurumngurumzə shiga ngodozə, Kanadi tai, nyiro rəmbukin diye, wono. Amma wazə, shiga sadə dangairo səkkə, sai shiro sərəmbiya wono.

Awo waazənədə waladi amanzə laaye corunya, karəgənza bannatə leza awanza njimmaro awo waazəna samma guljaa. Daji awanza njimmadəye waladidəga suroaro bowozə wono, Yanyi waladi kəlado, kəla wuga ngodosəmmaben kusu adə samma nyiro wanzəgəkəna adəson, ngama gəle nyi ye waladi kamanənga futu nyiga njimalngənagai njimalləmidə? sə bawanzə njimma ye gərgazə shiga musko am shiro azawu sadinbero səkkə sai shi ye shiro sammaso sərəmbiya wono.

Daji Yisaye tamozəgə wono, Kamandoga karəgəndon gafərnuwiga, Awanyi Samibe ye ndundosoro akkagaidəma sədin.

Matiyu 18:21-35

Futu Kəmaye nandiga gafərzənədəgai, nandi ye kamandoga gafərnowo. Kolosiwu 3:13

Misal kɛlayakkɛ mewube

Dawargata dɛgaiwo, dalilnzɛdɛ yekki-ndoan gɛnyi Kamdɛ ishin nankaro.

Matiyu 24:44

Sa Kamdɛ ishinna, kɛrmai Alabedɛ ruminga ferowa kɛlayakkɛ mewu fatɛlanza goza lorusa kaptɛgɛro coluwogairo rataltɛgin. Uwunza kaawu, uwunza burwoa. Awoa kaawusodɛ fatɛlanza gowadanya, kɛndagɛ gozanyi. Amma ferowa burwoasodɛ kɛndagɛnza jiwinnaro fatɛlanza gowada.

Lorusadɛ duwan isɛnyidɛ, daji sandi samma tɛngaksa letkada. Dawu buneben mawoza, Ngoshi lorusadɛ, luwowo shiga kapkɛgɛnowo, gada. Daji sandi samma ciza fatɛlanza caashanya, kaawusodɛye burwoasodɛro, Andiro kɛndagɛ gana sadowo, fatɛlandɛ nuin, gadanya, burwoasodɛye jaapsaa, Wanee andi sammasoga satinbawo, adɛdɛroga lenowo gurdomasoben yiwowo, gada.

Ferowa kaawusodə kəndagə njiworo leyadanya, lorusadə kadio. Ferowa dawar-tanasodə-a lorusa-a na kəlelebero tamu, cinnadə kərəp zakkada.

Daji ngawon ferowa kaawusodə walta isa, Ala ngəwuro, Ala ngəwuro, andiro cinna fərəmne, gada. Amma jaapsəgə, Nandiga nonzakənyi, haiyaro gulnzaakin, wono.



Daji Yisaye tamozəgə wono, Saawu adə nankaro, sokkubi yayero nyegənowo, dalilnzədə yimdə au sadəma nonuwi nankaro.

Matiyu 25:1-13

Kəmaga manowo təwandinlan, shiga ngodonowo fanjinlan.

Ishaya 55:6

Kawuske Alabega arowo hadarnowo

Kawuske kura

Kam laa suro masana zawinbedən . . .
Yisaro, Barganzə kam kəlele kərmai Ala-
beben masana zəwində, wono.

Yisaye shiro jaapsəgə wono, Kam laa
nasha ngəla mafəndi dawarzə am ngəwu
hadarjiwo. Sa nasha kəmbube citənya,
waladinzəga sunotə am duwo
hadarzəgənadəga bowozə sə, daji lezə,
Arowo abiso dawargata, wono.

Daji sandi sammaso fuwun ngawonnaro
hujja badiyada. Burwobedəye, Kulo



yiwukəna, lenge rukənyiga mowonjin-
bawo. Wuro gulle martəgə nyetsə, wono.
Adəgai fal ye, Dalo barebe mewu
yiwukəna, kərmamaro sandiga rizaptəro
letəlan kargako. Wuro gulle martəgə
nyetsə, wono. Kuru faldə ye shiro, Nyiya
dikəna, adə nankaro rangge iskinbawo,
wono. Daji waladidə waltə isə kəmanzəro
guljiwo.

Awa njimmadə gərgazə waladinzəro
wono, Doiro luye dandal-a zuwumi-a
gai, talaawa-a maskinwa-a kəmbuwa-a
ngurdunyiwa-a samne kude, sə daji waladi-
də lezə kadinya wono, Ala ngəwuro, awo
gulləmma samma ba tamotəna, yaye na
gapsəna mbeji. Kuru waltə awa njim-
madəye wono, Luye lene lai kurawa-a
cidiya kəskawasobe-a gai, amga yikke isa
fannyi səmbəliwu. Nandiro gulnzaakin, am
burwon hadartəgəna adəlan ndasonzama
nashanyi sətambinma bawo. Luka 14:15-24

Bargaande Yisaye wono: Kam nanyiro
isənamadə kənaye shiga sətainbawo, kuru
kam wuga kasatsənama ye nguduye gadero
shiga sətainbawo. Kuru ndu duwo nanyiro
isənamadə təmmaro shiga yongginbawo.

Yahaya 6:35,37

Kazəmu lorusarambe

Misaldəman Yisaye waltə sandiro manazəgə wono, Kərmai Alabedə ruminga alamanna mai laa tadanzəro kəlele lorusabe dawarzənagairo rataltəgin. Maidə kusotowadəga kururo cizə kadinya, surodən kam laa kazəmu lorusarambe baa curo. Maidəye kamdəro wono, Jilibimben, sawa, kazəmu lorusarambe mumidə na adəro kargaam? Kamdə yam ci baa dawono.

Daji maidəye waladiwanzəro wono, Shiga shi-a musko-an jerowo tuluwowo kəlməskə sələm fət na am sheshərə shelinza timin sataindəro gəpkəgənowo.

Daji Yisaye tamozəgə wono, Awoa ngəwu bowoza, amma suron gana karza nankaro.

Matiyu 22:1-2, 11-14

Kəma nankaro karəgənyi zauro tamtamma, anoskunyi ye kəji fanjin kəla Alanyiben. Dalilnzədə wuro gəmajə shafabe səkkəmuwu, barmusu nəmmu-minben wuga zaksəna nankaro.

Ishaya 61:10

Misal barewu aman baabe

*Alaye Tadzanzaga dinaga nzakkaworo
cunoto.* 1 Yahaya 4:14

Bargaande Yisaye wono: Kam laa kulo anabbe sədə, kulodəga kaliin dərizə surodən bəlaa anab nzəttabe-a ngərwo wutabe-a sətandə, kulodəga barewu laaro agərjiwo. Daji cizə bəlawuroro hapkatə.

Bigəla karənganya, shiro nəmanzə sowuduro waladiwanzəga na barewubedəro cunoto. Barewudə ye waladiwanzədəga fəraza sata faldəga kowoza, faldəga roro ceshenə, kənyakkəmibedəro dongur fijaa. Kuru waltə burwobedəmagaga kozənaro waladiwa nanzaro cunoto. Cabegai sandi yero cado.

Daryeyanya, Tadzanyidəroga bərzəm sadin, sə tadzanzəga cunoto. Amma barewudəye tadzanzədəga corunya amanzarogada, Adəma waratamadəwo, arowo shiga yejiyowo, waratanzə kaandəjin, sa shiga goza suro kulobedən bir sotuluwu ronzə gowada.

Adə nankaro kərma, kəmanzə kulobe adə ishiya, abi barewu anyiro sədin? sə Yisaye sandiga cuworunya, jaapsaa, Am diwi adəga diwindiro roro cejin ye, kuru



kulodəga gozə am gade bigəla sətiya shiro
nəmanzə sadinmaro agərizəgin, gada.

Matiyu 21:33-41

Kəmande Yisa Almasihuga waza cesheno

Kurawa limanwabe-a rashidiwa jamabe-a
samma ci foksa Yisaga roro ceshenin sa
shiga kurtuza fuwu gumna Bilatusbero
cowudo.

Abi gəle Yisa kam shiga Almasihulan
bowozaindəro dikin? sə gumna Bilatusye
sandiga cuworunya, sandi samma jaapsaa,

Shiga rogənowo, gada. Ngamaro? Aiwu abibe sədo? sə waltə Bilatusye sandiga cuworunya, cabe baro yilza, Shiga rogənowo, gada.

Ngawo shiro awo ronzabe sadə tamozaanaben . . . diwal shiga yadəm rotaabe cata.

Matiyu 27:1-2, 22-23, 31

Na Kul Kəlaben bowozaində cawandənya, nadən shiga rojaa . . . Daji sa adən Yisaye cinzə kazə, Bawa, awo sadində nozanyi, sandiga gafərne, wono.

Kuru waltə kowo hapsə, Bawa, noskunyi muskonəmro cikkəko, wononya tamowono.

Luka 23:33-34, 46

Majilasdən kam laa mbeji sunzə Yisuwu, shi kam adə kam ngəlama ye adal ye . . . shima na gumna Bilatusbero lezə, kamin Yisabe shiro sadə shitərazəro ngodozo. Daji kamindəga səsagə gawaalan kəkərzə, kawar duwo kau shesheksa sadənama nduma ngaltema surodəro sak-kənyiro cikko.

Luka 23:50, 52-53

Magəbe kawunzə falla, (kamuwa duwonyi Yisa-a rokko Galililan isanadə) fajarlan tawaza kawudi-a kəndagə samtabe dawarzanadə-a goza kawardəro leyadanya, kaudə ci kawarbedən təmbalgata cawando. Yaye surodəro kashargaanya kamin Kəmande Yisabega sawandənyi. Awo adəro hangalnza caa zatəna ngaidə, bia am indi karenza yiryirajin botowonzan dazana coro. Ritəro kamuwadə kəlanza cidiyaro cashaanya, amdəye sandiro gada, Ngamaro kam roa suro maituwaben manuwi? Shi na adəlan gənyi, ba cizəna. Tangnowo sa shi Galililan duwo nandiro awo gulzəgənadə, Kamdə musko ashiwabero hazaa shiga rozaain, kuru kawu yakkəa ye waltə cijin sənadə.

Luka 23:55. Luka 24:1-7

Kitawu Kəməbeye gulzənagai, Almasihudə bigənde nankaro konu . . . shiga shitəraada ye, Kitawu Kəməbeye gulzənagai kawu yakkəa roaro walzə ciwono.

1 Korintiwu 15:3-4

Misal zaribe

Bargaande Yisaye wono: Kərmai Alabedə ruminga alamanna zari bərəmro koltəgə bənyi jili jili woso sətanagai. Bənyi ferro sətanadə, bənyiwudəye gərza ci njibero sowudu napsa ngəla ngələdəga kəreza zoworo fizaa, batti battidəga yirgada, sə, Dina cijiya ye, adəgairo waljin, wono. Malaiyawa Kəmabe isa am diwiga suro muminwaben sotuluwu, sandiga suro kannu təltəlajin na am shesherə shelinza timin sataindəbero yirzaain.

Matiyu 13:47-50

Yahaya kingiyam Almasihubeye ruwozə wono: Diyal kərmaibe kura bul fok-a shi kələdən napsəna-a curuko . . . Kuru maituwa ye kura-a gana-a fuwu diyalbedən dazana, kuru kitawuwa yega fərəmgada. Kuru kitawu laa ye fərəmgada, shima Kitawu Robedəwo. Maituwa yega sharaada kəla kəndonza awo suro kitawuwabedən ruwotənaben. Kuru am duwonyi sunza suro Kitawu Robedən ruwowata təwandənyimadə, bərəm kannubero sandiga gəpcaa.

Kuru Yahayabe 20:11-12, 15

Kuma sa nzakkawobewo

Bargaande Yisaye wono:

Kamdəma shiro nəmwaladi sadəro gənyi kadio, amma shidəma amro nəmwaladidəga sədə, kuru ronzə ye fida am ngəwubero cə nankaro. Markus 10:45

Awoa caman nya Awanyibedə, ndu duwo Tadadəga suru, kasatsənamadə, ro abadabe səwandin, kuru wu ye dina cijiya shiga sangəkin. Yahaya 6:40

Wuma diwaldəwo, wuma jiredəwo, wuma rodəwo. Nduma wumben gənya na Bawabero ishinbawo. Yahaya 14:6

Wuma gaworamdəwo. Ndu duwo wumben gagənamadə, katə səwandəna. Yahaya 10:9

Wuma sunyima ngəlamawo. Sunyima ngəlamadə kəla dimiwaben ronzə səladin. Yahaya 10:11

Nandi katkun kurwowun mbaruwasodə, arowo nanyiro, nandiga nzasaake. Matiyu 11:28